



仁義潭水庫

欲去嘉義縣番路鄉的半中站，無叮無噹影著欲去仁義潭水庫愛正幹的路標，才一秒爾，心肝即時就予伊涎去，順箭頭的指示，閣駛差不多兩分鐘就到位矣。

照水壩頂懸所誑的告示共看起來，水頭是對八掌溪引入來的，直直的水壩體長一千五百米，用赤仁塗恰石狗卵疊予趨趨共水擋牢著，倚欲有三百甲遐大，是嘉義縣市食水的源頭之一。

平坦坦拍打馬膠的水壩頂，親像一條四米闊的大路，雙片攏有低低的欄杆圍咧，闊五十米長就有一葩嬌款嬌款無蓋光的路燈，大概欲予來遮行路的人較有心情，才會按呢鋪排。

規逝直溜溜東西向的路，無種看嬌的花樣，嘛無樹仔通閘蔭，連菅芒、雜草仔嘛挽甲清氣啖啖，強欲看無。毋過，身軀若向落去繩，加減都有一寡細細樣仔的花草會發佇塗路，毋是真顯目。比論講佇沙仔地才看會著的「毛馬齒莧」、發佇荒埔的「刺莧」、生佇駁坎頂的「長柄菊」，攏是誠耐命閣會忍得考旱的雜草仔。

我家己咧臆，好天有日頭的時陣，應該無人會來遮散步、運動，顛倒烏陰無日頭的時陣上蓋合。誠濟个尾暗仔，拄塘欲去嘉義揣人講寡話，我攏會刁工幹去，共車拋佇西片入口的車場，邊仔有五座面向水庫的涼亭，先坐落來淋水歇路，才開步順打馬膠路向東行去另外彼頭的水壩頂。沿路有手牽手的少年家仔、揀紅嬰仔車的翁仔某、穿短褲節仔咧運動的學生、放風吹的囡仔兄……，這內底顛倒是規家口仔的爸仔三母仔四來散步的占上大面。

行到盡磅的所在，有鋪棧枋的地板恰長椅仔欲予人坐落來歇喘、話仙，嘛有誑三跤馬當等欲翕紅霞的遊客，閣不止仔濟。路喙對面的崙仔頂猶有一間誠古早味的餐廳，會當淋咖啡、看夜景。我想會來遮的，個攏是在地人，取一步近才來罔行罔覘，像我這款盤山過嶺對雲林來的，應該無幾個。

作者：藍春瑞

☆詞彙學習☆

【半中站】puànn-tiong-tsām：半途

【無叮無噹】bô-tin-bô-tang：突然之間

【影著】iánn-tiòh：瞥見、瞄到

【涎】siánn：引誘、招引

【赤仁塗】tshiah-jîn-thôo：紅土

【石狗卵】tsiòh-káu-nñg：鵝卵石

【甲】kah：土地面積單位，約等於公頃。

【閘】làng：使間隔；間隔。

【閘蔭】tsáh-ńg：遮陰

【清氣啖啖】tshing-khi-tam-tam：清潔溜溜

【繩】tsîn：定睛細看

【顯目】hiánn-bák：引人注目

【考旱】khó-huānn：乾旱

【拄塘】tú-tñg：碰巧、湊巧

【拋】pha：停放。借自英語「park」。

【風吹】hong-tshue：風箏

【爸仔三母仔四】pē-á-sann bú-á-sì：父母子
女一家四口

【盡磅】tsin-pōng：到盡頭

【話仙】uê-sian：閒聊、閒扯